


VOK NEUTRAL

Diurnal modern in Idiom Neutral

Numr 1, januar-februar 2010, redakted in Tokyo
eksemplar gratis pro desharjasion libr



Lektatori kar,

Ko plesir grand mi komens publikasion de diurnal nov skribed totale in Idiom Neutral - lingu internasional presented in 1902 per Akademi Internasional de Lingu Universal, sub gid de Waldemar Rosenberger - injenier rusian da St. Petersburg. A reminiskar histor de Idiom Neutral, mi volu dikar, ke in 1887 esav kreed Akademi Internasional de Volapük (Kadem Bevünetik Volapüka). Po kuink anui, in 1892 Rosenberger deveniav sie direktor. Da tetempe Akademi komensav fasiar kelk variasijoni in lingu universal e kuale resultat de tel aktasion on av desided paroli nov, totale kambied. Ye on deb dikar, ke durante ke paroli

used in Volapük esav ordinare nerekonosabl, paroli used in Idiom Neutral av aspekt multe plu internasional, ergo ili es nemediate komprendabl. In 1898 Akademi de Volapük kambiav sie nom a Akademi de Lingu Universal e Idiom Neutral esav anunsied ofisiale in 1902. Sitempe it pene av parlatori (sole kelk personi), tekause mie intension es propagar it per ist diurnal. Visate et ist blogi, sekuantu kronologi de lor aparasion:

<http://vokneutral.wordpress.com/> (blog, kel mi skrib)

<http://linguneutral.wordpress.com/> (blog skribed per otr person)

<http://www.ipernity.com/blog/79634/home> (skribed per otr person)



Sitempe permita a mi presentar in kelk paroli, kual esero kontenad de ist diurnal. Prime, omnikos esero sempre skribed sole in Idiom Neutral. Sekunde, in komens de omni numr mi skribero saluti e paroli da redaktor. Terse, mi eforsero skribar artikli di landi mult e loki in mund a propagar voyaji agreabl ko usasion de Idiom Neutral. In ist numr mi skribero di Buenos Aires e di automobil Benz 1885, fotografad ansian de kel mi av meted su pagin prim. Finie, sempre esero lok pro eksersadi – frasi varios in Idiom Neutral pro votr delisi.

Redaktor desir a voi lektasion agreabl!

Propagation Modern de Idiom Neutral



Voyaji ko Idiom Neutral

Buenos Aires

Buenos Aires es urb leplu grand e prinsipal de Argentina, it es et urb sekund leplu grand in Amerik Sudik, po São Paulo. Signifikasion de nom Buenos Aires es “aeri bon”. Urb aut av 3 milioni habitatori, ma region metropolik av ipse 13 milioni homi. Buenos Aires esav funded per marist Pedro De Mendoza in 1536,

dudes anui po mort de otr marist - Juan Díaz De Solís, kel avav atined Río De La Plata ya in 1516, ma esav mortifiked per indigeni. Kausu ataki, keli urb tetempe resivav, it esav abandoned e refunded posteriore in 1580 per Juan de Garay. Buenos Aires modern av sentr multe bel ko edifisii multe alt e aléi multe larg. Alé de Novim Yuli es un eks stradi leplu larg in mund integr. In urb on potes visitar muséi varios e teatr multe grand – El Teatro Colón.



Di automobil Benz 1885

Ist automobil, nomed et Benz Patent Motorwagen es konsided kuale automobil prim de mund. It signifiek vehikl prim, kel esav moved mediu motor. Ist vehikl esed premied ko patent kausu sie originalitet. It esav presented primfoa a publik in urb germanian Mannheim in diurn 3 de mens yuli de 1886. Tel vehikl avav tri

roti e motor esav situed posteriore. Automobil integr esav multe lejer, it pesav sole 100 kilogrami! Voyaj prim plu long mediu tel automobil aksidav in august in anu 1888. El voyaj esav multe unik – marita de Karl Benz, siniora Bertha Benz avav prended vehikl magiik sine konos de sie marito. In sosietet de sue du filioi, ila vehiklav da Mannheim usk Pforzheim, it esav 106 kilometri. Voyaj no esav fasil, kause in el temp no ancor eksistav ruti pro automobili. Setre, ila debav selektar rut, kel pasav per kelk urbi ko apoteki, kause ila avav nesesitet de akuirar bensin. Voyaj integr esav sensasion grand pro homi mult e ipse multitet grand de homi sekuav sie automobil kursante su stradi de München. E it es afer interesant, ke sinior Benz konosav nokos di tel kasu! Bertha Benz partav matine e atinav destinasion vespre po dispar de sol. Ila av mited telegram a sue marito ko informasion, ke voyaj avav sukses. In diurn sekuant ila returnav a sue dom. Kelk sie sugestasioni av sukursed bonifikar tel automobil – pro eksempl on avav nesesitet de un guvern-levator adyunktubl neses durantu klimbasion su monteti. Tal noti esav multe important pro bonitet de automobil prim Benz.



Frasi varios in notr lingu

Kel shersh, tel truvero.

Parlasion es argent, silensi es aur.

Mi voluav promenar, ma kausu tempest mal mi resignav.

Il am edar bonboni, ma ili no es bon pro sie sanitet.

Eske vo no av oblivied, ke posidiurne butik esero klosed?

Mi am lektar libr bibante kaf.

Eske it es ver, ke sisemane it nevero?

Mon gaudi hom, ma it no potes donar felisitet.

VOK NEUTRAL numr 1 januar-februar 2010, Tokyo

P.M.I.N. (Propagasion Modern de Idiom Neutral)